

Transkription von Urkunde HST 1314a

Ort, Datierung: Stralsund, 1314-03-01

Signatur: Stadtarchiv Hansestadt Stralsund, StU 0120 [\[online\]](#)

Inhalt: Wizlaf van Ruyen: Stadtrecht

In godes namen amen . Wy wizlaf van godes ghenade vorste to ruyen Bekennen vnde tũghen in dessen
openen breuen Dat wy mit beradene mode / vnde mit guden willen na rade vser truwen manne hebben
ghe gheuen vnde ghelaten eweliken vser leuen stat tome stralessunde vnde allen / inwoneren der seluen
stat , de nu sint vnde noch tokomende sint , alsodane rechtecheyt vnde vryheit als de stat to rostok van
hern borwene / vnde sinen kinderen hinrike vnde claweze van oldens is ghe gheuen vnde ghelaten .
Quemet also des nicht en sche dat rostok in ereme / rechte vnde erer vriheyte krenket worde Jodoch
schal vse stat tome stralessunde vnde alle inwonere bi sodaneme rechte vnde vriheyte / bliuen eweliken
also hir vore screuen is „ Vortmer gheue wy en gantzen eghendom eweliken vnde yũmmer ouer de stat
stralessunde vn(de) ouer / al dat binnen erer scheyde is , an lande watere versch vnde solt an weyde an
holte busch vnde struke mor vnde brũk . acker buwet / vnde vnghebuwet vnde visgherie mit aller nũt
vnde vriheyte to des stades rechte . De schede to landewart beghinnet aldus . van / der schede to
voghedehaghen vp de schede to luderhaghen van der schede wente vppe de schede tome voghelsanghe ,
vort van der schede wente / vppe lutzower schede . Dar van vort bet vppe de schede to langhendorpe „
van der schede vort bet vp gherbodenhaghens schede . vort / went vp kedingherhaghen schede bet in
dat solte water Hir na beghint des solten wateres schede . van der nyen owe wente tome / ende des
yelandes „ van danne wente to deme ende to vmanz . van denne vort wente to byssin . van byssin wente
der beke brezenitz / mit der see to tevin mit dem deneholme „ Weder vort bet to der nygen owe ,
binnen desser vorbenomeden scheyde in beyden siden des / ouers vnde des strandes mit dem gantzen
egghendom . mit vriheyte vnde mit visgherie mit aller nũt to stades rechte also hir vor bescreue(n) / is .
Bynnen desser schede des solten wateres scholen vse man vnde vse lantzeten mene mit En visgherie
hebben , vort gheue wy ok / vser stat tome stralessunde dat vtuorent wente it en euene kũmt , vorbat
wolde yenich man schuldeghen vse borghere tome stralessunde / de schal en volghen in de stat tome
stralessunde vor den voghet vnde vor de ratman to richte als eyn stades recht is . It ne were dat he
butene / in eneme anderen richte breke oder dat men eme tospreke ṽmme lengut dar he man van were
„ vortmer leydes . willekores . vnde aller / anderen vriheyte also se van olders hebben ghehat scholen se
brũken . Hir bouen schal vse stat tome stralessunde in allen eren anderen hantuestin=/ghen de se
hebben vnvorsumet wesen „ vort mer dor vromen vn(de) dor makes willen vser stat tome stralessunde
gheue wy vn(de) sunderliken ghṽnne(n) / en des dat se moghen vn(de) scholen ere bescholdene ordele
voren vn(de) halen to lubeke „ ṽmme desse vorbenomeden stücke hebben se vs ghe gheuen ses durent /
mark wendescher pennynghen vn(de) vsen tollē weder vry den se kost hadden ṽmme vif durent mark
pennynghen . Den seluen tollē schal men nicht / verhoghen . mer he scal also bliuen als he heuet van
olders ghewesen , worde yeneghe schelinghe ṽmme den seluen tollē . de scolē de ratman tome
strales/sunde vntscheden mit eren eyden . vn(de) dat scal dar bi bliuen . Och scholen vse man bi
sodaneme rechte bliuen . als it van olders heuet ghewesen . Hir mede scal / endet vn(de) leghert wesen
al vnghemot . verdachtnisse vn(de) twidracht . ofte yenich twischen vs vn(de) vser stat tome
stralessunde heuet ghewesen . vn(de) wy scolē / er holde vn(de) er ghenedeghe here wesen . vn(de) se
scholen vse truwen borghere wesen „ Vppe dat desse vorbenomeden stücke . van vs . van vsen

erfnamen vn(de) vsen / nakomelinghen vaste vn(de) vntobroken eweliken bliuen . so hebbe wy desse scrift mit vsemi ingheseghele beseghelt to eneme eweghen orkunde . De tughe de / dar ouer weren heten aldus . her nycolaus van pudbūzke . her syuert van plone . her ernest budde de voghet . her nycolaus van starkowe perrere to bart / her otte slore de pleban tome stralessunde . her johan dotenberch . her herman van wokenstede . her renuart van penyz . her johan cabolt riddere . vnde / vele andere guder lude ,, Desse bref is ghe gheuen vnde ghescreuen in der stat tome stralessunde na godes bort Dusent jar Drehundert jar in dem / verteynden jare des vrydaghes na allermanne vaste